


水經

第一冊



水經第二十六

漢 桑 欽 撰

後魏 酈 道 元 注

明 吳 瑄 校

沫水

巨洋水

淄水

汶水

濰水

膠水

沫水出琅邪東莞縣西北山

大棄山與小太山連麓而異名也引控衆流積以

成川東南流逕邳鄉南南去縣八十許里城有三

面而不周於南故俗謂之半城沫水又東南流左

右峴水水北出大峴山東南流逕邳鄉東東南流注于沫水也

東南過其縣東

沫水左與箕山之水合水出東諸縣西箕山劉澄之以爲許由之所隱也更爲巨謬矣其水西南流注于沫水也

又東南過莒縣東

地理志曰莒子之國盈姓也少昊後列女傳曰齊人杞梁殖襲莒戰歿其妻將赴之道逢齊桓公公將弔之杞梁妻曰如殖有罪君何辱命焉如殖無

罪有先人之弊廬在下妾不敢與郊弔公旋車弔諸室妻乃哭於城下七日而城崩故琴操云殖歿妻援琴作歌曰樂莫樂兮新相知悲莫悲兮生別離哀感皇天城爲之墜卽是城也其城三重並悉崇峻唯南開一門內城方十二里郭周四十許里尸子曰莒君好鬼巫而國亾無知之難小白奔焉樂毅攻齊守嶮全國秦始皇縣之漢興以爲城陽國封朱虛侯章治莒王莽之莒陵也光武合城陽國爲琅邪國以封皇子京雅好宮室窮極伎巧壁帶飾以金銀明帝時京不安莒移治閭陽矣沫水

又南表公水東出清山尋坤維而注沫沫水又南  
潯水注之水出於巨公之山西南流舊竭以漑渚  
田東西二十里南北十五里潯水又西南流入沫  
沫水又南與葛陂水會水發三注山西南流逕辟城  
城南世謂之辟陽城史記建元以來王子侯者年  
表曰漢武帝元朔二年封城陽共王子節侯劉壯  
爲侯國也其水於邑積以爲陂謂之辟陽湖西南  
流注于沫水也

又南過陽都縣東入于沂

沫水自陽都縣又南會武陽溝水水東出倉山山

上有故城世謂之監官城非也卽古有利城矣漢  
武帝元朔四年封城陽共王子劉釘爲侯國也其  
城因山爲基水導山下西北流謂之武陽溝又西  
至卽丘縣注于沫沫水又南逕東海郡卽丘縣故  
春秋之祝丘也桓公五年經書齊侯鄭伯如紀城  
祝丘左傳曰齊鄭朝紀欲襲之漢立爲縣王莽更  
之就信也郡國志曰自東海分屬琅邪闕駟曰郎  
祝魯之音蓋字承讀變矣沫水又南逕東海厚丘  
縣王莽更之祝其亭也分爲二瀆西南出今無水  
世謂之枯水一瀆南逕建陵縣故城東漢景帝八

水經 卷之二十一  
年封石綰爲侯國王莽更之曰付亭也沫水又南  
逕陵山西魏正元中齊王之鎮徐州也立大堰遏  
水西流兩瀆之會置城防之曰曲沫戍自流三十  
里西注沫水舊瀆謂之新渠自厚丘西南出左會  
新渠南入淮陽宿預縣注泗水地理志所謂至下  
邳注泗者也經言於陽都入沂非矣沫水左瀆自  
大堰水斷故瀆東南出桑堰水注之水出襄賁縣  
泉流東注沫瀆又南左合橫溝水水發瀆右東入  
沫之故瀆又南暨于堰其水西南流逕司吾山東  
又逕司吾縣故城西春秋左傳楚執鍾吾子以爲

司吾縣王莽更之息吾也又西南至宿預注泗水  
也沫水故瀆自下堰東南逕司吾城東又東南歷  
祖口城中祖水出於楚之祖地春秋襄公十年經  
書公與晉及諸侯會吳于祖京相璠曰宋地今彭  
城偃陽縣西北有祖水溝去偃陽八十里東南流  
逕偃縣故城東北地理志曰故偃陽國也春秋左  
傳襄公十年夏四月戊午會于祖晉荀偃士匄請  
伐偃陽而封宋向戌焉荀瑩曰城小而固勝之不  
武弗勝爲笑固請丙寅圍之弗克孟氏之臣秦堇  
父輦重如役偃陽人啓門諸侯之士門焉縣門發

鄴人紇抉之以出門者狄虓彌建大車之輪而蒙之以甲以爲櫓左執之右拔戟以成一隊孟獻子曰詩所謂有力如虎者也主人縣布瑩父登之及堞而絕之墜則又縣之蘇而復上者三主人辭焉乃退帶其斷以徇於軍三日諸侯之師久於偃陽請歸智伯怒曰七日不克爾乎取之以謝罪也偃士攻之親受矢石遂滅之以偃陽子歸獻子于武宮謂之夷俘偃陽妖姓也漢以爲縣漢武帝元朔三年封齊孝王子劉就爲侯國王莽更之輔陽也郡國志曰偃陽有祖水祖水而南亂于沂而注于

沫謂之祖口城得其名矣東南至煦縣入游注海也

巨洋水出朱虛縣泰山北過其縣西

泰山卽東小泰山也巨洋水卽國語所謂具水矣袁宏謂之巨昧王韶之以爲巨曩亦或曰胸瀾皆一水也而廣其目焉其水北流逕朱虛縣故城西漢惠帝二年封齊悼惠王子劉章爲侯國地理風俗記曰丹山在西南丹水所出東入海丹水由朱虛丘阜矣故言朱虛城西有長坂遠峻名爲破車峴城東北二十里有丹山世謂之几山縣在西南

九經 卷之三十六  
非山也丹几字相類音從字變也山導丹水有二源各導一山世謂之東丹西丹水也西丹自穴山北流逕劇縣故城東東丹水注之出方山山有三水一水卽東丹水也北逕縣合西丹水而亂流又東北出逕洿薄澗北洿水亦出方流入平壽縣積而爲渚水盛則北■東南流屈而東北流逕平壽縣故城西而北入丹謂之魚合口丹水又東北逕望臺東東北注海蓋亦縣所氏者也  
又北過臨朐縣東

巨洋水自朱虛北入臨朐縣熏冶泉水注之水出

西谿飛泉側瀨於窮坎之下泉谿之上源麓之側有一祀目之爲冶泉祀按廣雅金神謂之清明斯地蓋古冶官所在故水取稱焉水色澄明而清泠特異淵無潛石淺鏤沙文中有古壇參差相對後人微加功飾以爲嬉遊之處南北邃岍凌空疎木交合先公以太和中作鎮海岱余總角之年持節東州至若炎夏火流閑居倦想提琴命友嬉娛永日桂筍尋波輕林委浪琴歌旣洽懽情亦暢是焉棲寄實可憑衿小東有一湖佳饒鮮筍匪直芳齊芍藥實亦潔並飛鱗其水東北流入巨洋謂之熏

水經 卷之三十六  
冶泉又逕臨朐縣故城東城古伯氏駢邑也漢武帝元朔二年封菑川懿王子劉奴侯國應劭曰臨朐山名也故縣氏之朐亦水名其城側川臨朐是以王莽用表厥稱焉其城上下泚水悉是劉武皇北伐廣固營壘所在矣巨洋又東北逕委粟山東孤阜秀立形若委粟又東北洋水注之水西出石膏山西北石澗口東南逕逢山下祠西洋水又南東歷逢山下卽石膏山也麓三成壁立直上山上有石鼓鳴則年凶郭緣生續述征記曰逢山在廣固南三十里有祠并石鼓齊地將亂石人輒打石鼓

聞數十里洋水歷其陰而東北流世謂之石溝水東北流出於委粟山北而東注于巨洋謂之石溝曰然是水下流亦有時通塞及其春夏水泛川瀾無輟亦或謂之爲龍泉水地理志石膏山洋水是出也今於此縣唯是瀆當之似符羣證矣巨洋又東北得邳泉口泉源西出平地東流注于巨洋巨洋又北會建德水水西發逢山阜而東流入巨洋水也

又北過劇縣西

巨洋水又東北合康浪水水發縣西南嶼山無事



樹木而負峭孤峙巘岼分立左思齊都賦曰嶼嶼其左是也康浪水北流注於巨洋巨洋又東北逕劇縣故城西古紀國也春秋莊公四年紀侯不能下齊以與弟季大去其國違齊難也後改曰劇故魯連子曰胸劇之人辯者也漢文帝十八年別爲菑川國後并北海漢武帝元朔二年封菑川懿王子劉錯爲侯國王莽更之愈縣也城之北側有故臺臺西有方地晏謨曰西去齊城九十七里耿弇破張步於臨淄追至巨洋水上僵尸相屬即是水也巨洋又東北逕晉龍驤將宣幽州刺史辟閭渾墓

東而東北流渾側有一墳甚高大時人咸謂之爲焉陵而不知誰之丘壟也巨洋水又東北逕益縣故城東王莽更之滌蕩也晏謨曰南去齊城五十里司馬宣王伐公孫淵北徙豐人住於此城遂改名爲南豐城也又東北積而爲潭枝津出焉謂之百尺溝西北流逕北益都城也漢武帝元朔三年封菑川懿王子劉胡爲侯國又西北流而注于巨淀矣

又東北過壽光縣西

巨洋水自湖東北流逕縣故城西王莽之翼平亭

也漢光武建武二年封更始子鯉爲侯國城之西南水東有孔子石室故廟堂也中有孔子像弟子問經旣無碑誌未詳所立巨洋又東北流堯水注之水出劇縣南有崩山卽故義山也俗人以其山角因名爲角崩山亦名爲角林山皆世俗音譌也水卽蕤水矣地理志曰劇縣有義山蕤水所出也北逕嶼山東俗亦名之爲青水矣堯水又東北逕東西壽光二城間應劭曰壽光縣有灌亭杜預曰在縣東南斟灌國也又言斟亭在平縣壽東南平壽故城在白狼水西今北海郡治水上承營陵縣

之下流東北逕城東西入別畫湖亦曰朕懷湖湖東西二十里南北三十里東北入海斟亭在漑水東水出桑犢亭東覆甌山亭故高密郡治世謂之故郡城山謂之塔山水曰鹿孟水亦曰戾孟水皆非也地理志曰桑犢故亭北海之屬縣矣有覆甌山漑水所出北逕斟亭西北今日狼水按地理志北海有斟縣京相璠曰故斟尋國禹後西北去灌亭九十漑水又北逕寒亭西郡國志曰平壽有斟灌東薛瓚漢書集注云按汲郡古文相居斟灌東郡灌是也明帝以封周後改曰衛斟尋在河南非

平壽也又云太康居斟尋羿亦居之桀又居之尚  
書序曰太康失國兄弟五人徙于洛汭此卽太康  
之居爲近洛也余考瓚所據今河南有尋也衛國  
有觀土國語曰啓有五觀謂之姦子五觀蓋其名  
也所處之邑其名曰觀皇甫謐曰衛也又云夏相  
徙南丘依同姓之諸侯于斟灌斟尋氏卽汲冢書  
云相居斟灌也旣依斟尋明斟尋非一居矣窮后  
旣仗善射篡相韓浞亦因逢蒙弑羿卽其居以生  
澆因其室而有殪故春秋襄公四年魏絳曰澆用  
師滅斟灌及斟尋氏處澆於過處殪于戈是以伍

員言於吳子曰過澆殺斟灌以伐斟尋是也有夏  
之遺臣曰靡事羿羿之歿也逃于隔氏今隔縣也  
收斟灌尋二國之餘燼殺韓浞而立少康滅之有  
窮遂亾也是蓋寓其居而生其稱宅其業而表其  
邑縱遺文泐禡亭郭有傳未可以彼有灌目謂此  
專此爲捨此尋名而專彼爲是以上推傳應氏之  
據亦可按矣堯水又東北注巨洋伏琛晏謨並言  
堯嘗頓駕於此故受名焉非也地理志曰蕤水自  
劇東北至壽光入海泂其逗颺卽是水也  
又東北入于海

巨洋水東北逕望海臺西東北流伏環晏謨並以爲平望亭在平壽縣故城西北八十里古縣又或言秦始皇升以望海因曰望海臺未詳也按史記漢武帝元朔二年封菑川懿王子劉賞爲侯國又東北注于海也

淄水出泰山萊蕪縣原山

淄水出縣西南山下世謂之原泉地理志曰原山淄水所出故經原山之論矣淮南子曰水出自飴山蓋山別名也東北流逕萊蕪谷屈而西北流逕其縣故城南從征記曰城在萊蕪谷當路咀絕兩

山間道由南北門漢末有范史雲爲萊蕪令言萊蕪在齊非魯所得引舊說云齊靈公滅萊萊民播流此谷邑落荒蕪故曰萊蕪禹貢所謂萊夷也夾谷之會齊侯使萊人以兵劫魯侯宣尼稱夷不亂華是也余按太無萊祚並山名也郡縣取目焉漢高祖置左傳曰與之無山及萊祚是也應劭十三州記曰太山萊蕪縣魯之萊祚邑淄水又西北轉逕城西又東北流與一水合水出縣東南俗謂之家桑谷水從征記名曰聖水列仙傳曰鹿皮公者淄川人也少爲府小史才巧舉手成器岑山上有

神象人不能到小史白府君請木工斧三十人作  
轉輪造縣閣意思橫生數十日梯道成上其嶺作  
祠屋留止其傍其二間以自固食芝華飲神泉七  
十餘年溜水未下呼宗族得六十餘人命上山半  
水出盡漂一郡没者萬計小史辭遣宗室令下山  
著鹿皮衣升閣而去後百餘年下賣藥齊市也其  
水西北流注溜水溜水又北出山謂之萊蕪口東  
北流者也

又東北過臨淄縣東

溜水自山東北流逕牛山西又東逕臨淄縣故城

南東得天齊水口水出南郊山下謂之天齊淵五  
泉並出南北三百步廣十步山即牛山也左思齊  
都賦曰牛嶺鎮其南者也水在齊八祠中齊之爲  
名起於此矣地理風俗記曰齊所以爲齊者即天  
齊淵名也其水北流注於溜水又東逕四豪冢北  
水南山下有四冢方基員墳咸高七尺東西直列  
是田氏四王冢也溜水又東北逕陽陰里西水東  
有冢一基三墳東西八十步是烈士公孫接田開  
疆古冶子之墳也晏子惡其勇無禮投桃以斃之  
於葬陽里即此也溜水又北逕其城東城臨溜水

九經 卷之二十六 十三  
故曰臨淄王莽之齊陵縣也爾雅曰水出其前左  
爲營丘武王以其地封太公望賜之以四履都營  
丘爲齊或以爲都營陵史記周成王封師尚父于  
營丘東就國道宿行遲萊侯與之爭營丘逆旅之  
人曰吾聞時難得而易失客寢安殆非就封者也  
太公聞之夜衣而行至營丘陵亦丘也獻公自營  
丘徙臨淄余按營陵城南無水唯城北有一水世  
謂之白狼水西出丹山俗謂凡山也東北流山爾  
雅出前左之文不得以爲營丘矣營丘者山名也  
詩所謂子之營兮遭我乎穽之間兮作者多以丘

陵號同又去萊羌近咸言太公所封考之春秋經  
書諸侯城緣陵左傳曰遷杞也毛詩鄭注並無營  
字瓚以爲非近之今臨淄城中有丘在小城內周  
迴三百步高九丈北降丈五淄水出其前故有營  
丘之名與爾雅相符城對天齊淵故城有齊城之  
稱是以晏子言始爽鳩氏居之逢伯陵居之太公  
居之又曰先君太公築營之丘季札觀風聞齊音  
曰泱泱乎大風也哉表東海者其太公乎回巴入  
齊過淄自鏡郭景純言齊之營丘淄水逕其南及  
東也非營陵明矣獻公之徙其猶晉氏深翼居絳

水經 卷之三十六  
非謂自營陵而之也其外郭卽獻公所徙臨淄城也世謂之虜城言齊湣王伐燕燕王噲歿虜其民寶居因郭以名之秦始皇三十四年滅齊爲郡治臨淄漢高六年封子肥於齊爲王國王莽更名濟南也戰國策曰田單爲齊相過淄水有老人涉淄而出不能行坐沙中單乃解裘於斯水之上也又東過利縣東

淄水自縣東北流逕東安平城北又東逕巨淀縣故城南征和四年漢武帝幸東萊臨大海三月耕巨淀卽此也縣東南則巨淀湖蓋以水受名也淄

水又東北逕廣饒縣故城南漢武帝元鼎中封菑川靖王子劉國爲侯國淄水又東北馬車瀆水注之受巨淀淀卽濁水所注也呂忱曰濁水一名溷水出廣縣爲山世謂之治嶺山東北流逕廣固城西城在廣縣西北四里四周絕澗咀水深隍晉永嘉中東萊人曹嶷所造也水側山際有五龍口義熙五年劉武帝伐慕容超於廣固也以藉嶮難攻兵力勞弊河間人玄文說裕云昔趙攻曹嶷望氣者以爲繩水帶城非可攻拔若塞五龍口城當必陷石虎從之嶷請降降後五日大雨雷電震開後

慕容恪之攻拔龕十旬不拔塞城而龕降降後無  
幾又震開之舊基猶存宐城修築裕塞之超及城  
內男女皆悉腳弱病者大半超遂出奔爲晉所擒  
也然城之所跨實憑地嶽其不可固城者在此濁  
水東北流逕堯山東從征記曰廣固城北三里有  
堯山祠堯因巡狩登此山後人遂以名山廟在山  
之左麓廟像東面華宇修整帝圖嚴飾軒冕之容  
穆然山之上頂舊有上祠今也毀廢無復遺式盤  
石上尚有人馬之跡徒黃石而已唯刀劍之蹤逼  
真矣至於燕鋒代鐔魏鉞齊銘與今劍莫殊以密

模寫知人功所制矣西望胡公陵孫暢之所云青  
州刺史傅弘仁言得銅棺隸書處濁水又東北流  
逕東陽城北東北流合長沙水水出逢山北阜世  
謂之陽水也東北流逕廣縣故城西舊有州刺史  
治亦曰青州城陽水又東北流石井水注之水出  
南山頂洞開望若門焉俗謂是山爲磐頭山其水  
北流注井井際廣城東側三面積石高深一匹有  
餘長津激浪瀑布而下澎聳之音驚川聒谷湍湊  
之勢狀同洪井北流入陽水余生長東齊極遊其  
下於中闊絕乃積綿載後因王事復出海岱郭金



紫惠同石井賦詩言意彌日嬉娛尤慰羈心但恨此水時有通塞耳陽水東逕故七級寺禪房南水北則長廡徧駕迴閣承阿林之際則繩坐疏班錫鉢閒設所謂修修釋子眇眇禪棲者也陽水又東東逕陽城東南義熙中晉青州刺史羊穆之築此以在陽水之陽卽謂城之東陽城世以濁水爲西陽水故也水流亦有時窮通信爲靈矣昔在宋世是水絕而復流劉晃賦通津焉魏太和中此水復竭輟流積年先公滁州卽任未暮是水復通澄映盈川所謂幽谷枯而更溢窮泉輟而復流矣海岱

之士又頌通津焉平昌耆民孫道相頌曰唯彼繩泉竭踰三齡祈盡珪璧謁窮斯牲道從隆替降由聖明耆民河閒趙嶷頌云敷化未暮玄澤潛施枯源揚瀾涸川滌陂北海郭欽曰先政輟津我后通洋但頌廣文煩難以具載陽水又北屈逕漢城陽景王劉章廟東東注于巨洋後人竭斷令北注濁水時人通謂濁水爲陽水故有南陽北陽水之論二水渾流世謂之爲長沙水也亦或通名之爲繩水故晏謨伏琛爲齊記並云東陽城旣在繩水之陽宜爲繩陽城非也世又謂陽水爲洋水余按羣

書盛言洋水出臨朐縣而陽水導源廣縣兩縣雖  
隣川土不同於事疑焉濁水又北逕臧氏臺西又  
北逕益城西又北流注巨淀地理志曰廣縣爲山  
濁水所出東北至廣饒入巨淀巨淀之右又有女  
水注之水出東安平縣之蛇頭山從征記曰水西  
有栢公冢甚高大墓方七十餘丈高四丈員墳圍  
二十餘丈高七丈餘一墓方七丈二墳晏謨曰依  
陵記非葬禮如承世故與其母同墓而異墳伏琛  
所不詳也冢東山下女水原有栢公祠侍其衡奏  
魏武王所立曰近日路次齊郊瞻望栢公墳壟在

南山之阿請爲立祀爲塊然之主郭緣生述征記  
曰齊栢公冢在齊城南二十里因山爲墳大冢東  
有女水或云齊栢公女冢在其上故以名水也女  
水導川東北流甚有神焉化隆則水生政薄則津  
竭燕建平六年水忽暴竭玄明惡之寢病而亾燕  
太上四年女水又竭慕容超惡之燕祚遂淪女水  
東北流逕東平安縣故城南續述征記曰女水至  
安平城南伏流一十五里然後更流注北楊水城  
故鄒亭也春秋魯莊公三年紀季以鄒入齊公羊  
傳曰季者何紀侯弟也賢其伏罪請鄒以奉五祀

田成子單之故邑也後以爲縣博陵有平故此加東也世祖建武七年封菑川王子劉茂爲侯國又逕安平城東東北逕壘丘東東北入淀地理志曰菑頭山女水所出東北至臨淄入巨淀又北爲馬車瀆北合淄水又北時繩之水注之時水出齊城西南北二十五里平地出泉卽如水也亦謂之源水因水色黑俗又目之爲黑水西北逕黃山東又北歷愚山山東有愚公冢時水又屈而逕杜山北有愚公谷齊桓公時公隱於谿隣有認其駒者公以與之山卽杜山之通阜以其人狀愚故謂之愚

公故山水有石梁亦謂爲石梁水又有澧水注之水出時水東去臨淄城十八里所謂澧中也俗以澧水爲宿留水西北入于時水孟子去齊三宿而後出澧故世以此而變水名也水南山西有王歊墓昔樂毅伐齊賢而封之歊不受自縊而歊水側有田引水漑跡尚存時水又西北逕西安縣故城南本渠也齊大夫雒稟之邑矣王莽更之曰東寧時水又西至石洋堰分爲二水謂之石洋口枝津西北至梁鄒入沛時水又北逕西安城西又北京水系水注之水出齊城西南世謂寒泉也東北流

直申門西京相璠杜預並言申門卽齊城南面西  
第一門矣爲申池昔齊懿公遊申池邴戎庸職二  
人害公於竹中今池無復髣髴然水側尚有小小  
木以時遺生也左思齊都賦注申池左海濱齊  
藪也余按春秋襄公十八年晉伐齊戊戌伐讎門  
之荻巳亥焚雍門壬寅焚東北二郭甲辰東侵及  
沂而不言北掠于海且晉獻子尚不辭歿以逞志  
何容對仇敵而不徵暴草木于海隅乎又炎夏火  
流非遠遊之辰懿公見弑蓋曰白龍魚遯見困近  
郊矣左氏捨近遺遠考古非議杜預泛言有推據

耳系水傍城北流逕陽門西水次有故封處所謂  
齊之稷下也當戰國之時以齊宣王喜文學遊說  
之士鄒衍淳于髡田駢接于慎到之徒七十六人  
皆賜列第爲上大夫不治而論議是以齊稷下學  
士復盛且數百十人劉向別錄以稷爲齊城門名  
也談說之士期會於稷門下故曰稷下也鄭志曰  
張逸問贊云我先師棘下生何時人鄭玄答云齊  
田氏時善學者所會處也齊人號之棘下生無常  
人也余按左傳昭公二十二年莒子如齊盟于稷  
門之外漢以叔孫通爲博士號稷嗣君史記音義

曰欲以繼蹤齊稷下之風矣然棘下又是齊城內地名左傳定公八年陽虎劫公伐孟氏入自上東門戰于南門之內又戰于棘下者也蓋亦儒者之所萃焉故張逸疑而發問鄭玄釋而辯之雖異名于見大歸一也城內有故臺有營丘有故景王祠卽朱虛侯章廟矣晉起居注云齊有大蛇長三百步負小蛇長百餘步逕於市中市人悉觀自北門所入處也北門外東北二百步有齊相晏嬰冢宅左傳晏子之宅近市景公欲易之而嬰弗更爲誠曰吾生則近市死豈易志乃葬故宅後人名之曰

清節里系水又北逕臨淄城西門北而西流逕梧宮南昔楚使躬齊齊王饗之梧宮卽是宮矣其地猶梧臺里臺甚層秀東西一百餘步南北如減卽古梧宮之臺臺東卽關子所謂宋愚人得燕石處臺西有石柱碑碑猶存漢靈帝熹平五年立其題云梧臺里系水又西逕葵丘北春秋莊公八年襄公使連稱管至父戍葵丘京相璠曰齊西五十里有葵丘地若是無戍之僖公九年齊桓會諸侯于葵丘宰孔曰齊侯不務修德而勤遠畧葵丘不在齊也引胡廣汾陰葵丘山陽西北葵城宜在此非

也余原左傳連稱管至父之戍葵丘以瓜時而往  
還之期請代弗許將爲齊亂故令無寵之姝候公  
於宮因無知之絀遂害襄公若出遠無代寧得謀  
及婦人而爲公室之亂乎是以杜預稽春秋之旨  
卽傳安之注于臨淄西不得捨近託遠苟成已異  
於異可姝卽義爲負然則葵丘之戍卽此地也時  
水西左迤爲潭又西逕高陽僑郡南魏所立也又  
西北流注于時時水又東北流繩水注之水出營  
城東世謂之漢溱水也西北流逕營城北漢景帝  
四年封齊悼惠王子劉信都爲侯國繩水又西逕

樂安南博昌縣故城南應劭曰昌水出東萊昌陽  
縣道遠不至取其嘉名闕駟曰縣處勢平故曰博  
昌繩水西歷貝丘京相璠曰博昌縣南近繩水有  
地名貝丘在齊西北四十里春秋莊公八年齊侯  
田于貝丘見公子彭生豕立而泣齊侯墜車傷足  
於是處也繩水又西北入時水從征記又曰水出  
臨淄縣北逕樂安博昌南界西入時水者也自下  
通謂之爲繩也昔晉侯與齊侯宴齊侯曰有酒如  
繩指喻此水也時水又屈而東北逕博昌城北時  
水又東北逕齊利縣故城北又東北逕巨淀縣故

城北又東北逕廣饒縣故城北東北入淄水地理  
風俗志曰淄入濡淮南子曰白公問微言曰若以  
水投水如何孔子曰淄繩之水合易牙嘗而知之  
謂斯水矣

又東北入于海

淄水入馬車瀆亂流東北逕琅槐故城南又東北  
逕馬井城北與時繩之水互受通稱故邑流其號  
又東北至皮丘沈入于海故晏謨伏琛並言淄繩  
之水合於皮丘沈西地理志曰馬車瀆至琅槐入  
于海也蓋舉縣言也

汶水出朱虛縣泰山

山上有長城西接岱山東連琅邪巨海千有餘里  
蓋田氏之所造也竹書紀年梁惠成王二十年齊  
築防以爲長城竹書又云晉列公十二年文王命  
韓景子趙列侯翟員伐齊人長城史記所謂齊威  
王越趙侵伐我長城者也伏琛晏謨並言水出縣  
東南崑山山在小泰山東者也

北過其縣東

汶水自縣東北逕崑城北地理風俗記曰朱虛縣  
東四十里有崑城亭故縣也又東北逕管寧冢東

九經 卷之二十六 十三  
故晏謨言柴阜西南有魏獨行君子管寧墓墓前有碑又東北逕柴阜山北山之東有徵士邴原冢碑誌存焉汶水又東北逕漢青州刺史孫嵩墓西有碑碣汶水又東逕安丘縣故城北漢高帝八年封將軍張說爲侯國地理志曰王莽之誅邳也孟康曰今渠丘亭莒渠丘城是也伏琛晏謨齊記並言亭在丘城東北十里非城也城對牟山山之西南有孫賓碩兄弟墓碑志並在也

又北過淳于縣西又東北入于縣故夏后氏之斟灌國也周武王以封淳于公號曰

淳于國春秋桓公六年冬周公如曹傳曰淳于公如曹度其國危遂不復也其城東北則兩川交會也

濰水出琅邪箕縣

琅邪山名也越王勾踐之故國也勾踐并吳欲霸中國徙都琅邪秦始皇二十六年滅齊以爲郡城卽秦王之所築也遂登琅邪大樂之山作層臺於其上謂琅邪臺臺在城東南十里孤立特顯出于衆山上下周二十里餘傍濱巨海秦王樂之因留三月乃徙黔首二萬戶於琅邪山下復十二年所



作臺基三層層高三丈上級平敞方二百餘步高  
五里刊石立碑紀秦功德臺上有神淵淵主靈焉  
人汗之則竭齊潔則通神廟在齊八祠中漢武帝  
亦嘗登之漢高帝呂后七年以爲王國文帝三年  
更名爲郡王莽改曰填夷矣濰水導源濰山許慎  
呂忱云濰水出箕屋山淮南子曰濰水出覆舟山  
蓋廣異名也東北逕箕縣故城西又西析泉水注  
之水出析泉縣北松山東南流析泉縣東又東南  
逕仲固山東北流入于濰地理志曰至箕縣北入  
濰者也濰水又東北逕諸縣故城西春秋文公十

二年季孫行父城諸及鄆傳曰城其下邑也王莽  
更名諸并矣濰水又東北涓水注之出馬耳山山  
高百丈上有二石並舉望齊馬耳故世取名焉東  
去常山三十里涓水發于其陰北逕婁鄉城東春  
秋昭公五年經書夏莒牟夷以牟婁防茲來奔者  
也又分諸縣之東爲海曲縣故俗人謂此城爲東  
諸城涓水又北注于濰水

東北過東武城縣西

縣因岡爲城城周三十里漢高帝六年封郭蒙爲  
侯國王莽更名之曰祥善矣又北左合扶淇之水

水出西南常山東北流注濰晏謨並以濰水為扶  
淇之水以扶淇之水為濰水非也按經脉誌濰自  
箕縣北逕東武縣西北流合扶淇之水晏謨伏琛  
云東武城西北二里濰水者即扶淇之水也濰水  
又北右合盧水即久台水也地理志曰水出琅邪  
橫縣故山王莽之合丘也山在東武縣故城東南  
世謂之盧山也西北流逕昌縣故城西東北流齊  
地記曰東武城東南有盧水水側有勝火木方俗  
音曰檉子其木經野火燒灰炭不滅故東方朔不  
灰之木者也其水又東北流逕東武縣故城東而

西北入濰地理志曰久台水出東南逕東武入濰  
者也尚書所謂濰淄其道矣

又北過平昌縣東

濰水又北逕石泉縣故城西王莽之養信也地理  
風俗記曰平昌縣東南四十里有石泉亭故縣也  
濰水又北逕平昌縣故城東荆水注之水出縣南  
荆山阜東北流逕平昌縣故城東漢文帝封齊悼  
惠王肥子永為侯國城之東南角有臺臺下有井  
與荆水通物墜於井則取之荆水昔常有龍出入  
于其中故世亦謂之龍臺城也荆水又東北流注

于澠水又北浯水注之水出浯山世謂之巨平山也地理志曰靈門縣有高原山與浯一山浯水所出東北入澠今是山西接浯山許慎說文言水出靈門山世謂之浯汶矣其水東北逕姑幕縣故城東縣有五色土王者封建諸侯隨方受之故薄姑氏之國也闕駟曰周成王時薄姑與四國作亂周公滅之以封太公是以地理志曰或言薄姑也王莽曰季睦矣應劭曰左傳曰薄姑氏國太公封焉薛瓚漢書注云博昌有薄姑城未知孰是浯水又東北逕平昌縣故城北古場此水以溢溉田南注

荆水浯水又東北流而注于澠水也

又北過高密縣西

應劭曰縣有密水故有高密之名也然今世所謂百尺水者蓋密水也水有二源西源出奕山亦曰鄆日山晏謨曰山狀鄆日是有此名伏琛曰山上鄆日故名鄆日山也其水東北流東源出五弩山西北流同瀉一壑俗謂之百尺水古人場以溉田數十頃北流逕高密縣西下注澠水自下亦兼通稱焉亂流歷縣西碑產山西又東北水有故堰舊鑿石豎柱斷澠水廣六十許步掘東岸激通長渠

東北逕高密故城南明帝中元中封鄧震為侯國縣南十里蓄以為塘方二十餘里古所謂高密之南都也溉田一頃許陂水散流下注矣安澤濰水自堰北逕高密縣故城西漢文帝十六年別為膠西國宣帝平始元年更為高密國王莽之章牟也濰水又北昔韓信與楚將龍且夾濰水而陣於此信夜令為萬餘囊盛沙以遏濰水引軍擊且偽退且追北信決水水大至且軍半不得渡遂斬龍且於是水水西有鴈阜阜上有漢司農卿鄭康成冢石碑猶存又北逕昌安縣故城東漢明帝中元中

封鄧襲為侯國也郡國志曰漢安帝延光元年復也

又北過淳于縣東

濰水又北左會汶水北逕平城亭西又東北逕密鄉亭西郡國志淳于縣有密鄉地理志皆北海之屬縣也應劭曰淳于縣東北六十里有平城亭又四十里有密鄉亭故縣也濰水又東北逕下密縣故城西城東有密阜地理志曰有三石山祠余按應劭密者水名是有下密之稱俗以名阜非也

又東北逕都昌縣東

水經 卷之三十六  
濰水東北逕逢萌縣人也少有大節耻給事縣亭  
遂浮海至遼東復還在不其山隱學明帝安車徵  
萌以佯狂免又北逕都昌縣故城東漢高祖六年  
封朱軫爲侯國北海相孔融爲黃巾賊管玄所圍  
於都昌也太史慈爲融求救劉備持的突圍其處  
也

又東北入于海

膠水出黔陬縣膠山北過其縣西

齊記曰膠水出五弩山蓋膠山之殊名也北逕祝  
茲縣故城東漢武帝元鼎中封膠東康王子延爲

侯國又逕扶縣故城西地理志琅邪之屬縣也漢  
文帝元年封呂平爲侯國膠水又北逕黔陬故城  
西袁崧郡國志曰縣有介亭地理志曰故介國也  
春秋僖公九年介葛盧來朝聞牛鳴曰是生三犧  
皆用之問之果然晏謨伏琛並去縣有東西二城  
相去四十里有膠水非也斯乃拒艾水也水出縣  
西南拒艾山卽齊記所謂黔艾山也東北流逕拒  
縣故城西王莽之秩國也世謂之王城又謂是水  
爲洋洋水矣又東北逕晏伏所謂黔陬城西四十  
里有膠水者也又東入海地理志曰琅邪有推縣

水經 卷之三十六  
拒艾水出焉東入海卽斯水也今膠水北逕晏伏  
所謂西黔陬城東高密郡側有黔陬縣地理志曰  
膠水出郯縣王莽更之純德矣疑卽是縣所未詳  
又北過夷安縣東

縣王莽更名之曰原亭也應劭曰故萊夷邑也太  
史公曰晏平仲萊之夷維之人也漢明帝中元中  
封鄧珍爲侯國西去濰水四十里膠水又北逕膠  
陽東晏伏並謂之東亭自亭結路南通夷安地理  
風俗記曰淳于縣東南五十里有膠陽亭故縣也  
又東北逕左會一水世謂之張奴水水發夷安縣

東南阜下西北流歷膠陽縣注于膠水之左東北  
爲澤水渚百許里謂之夷安潭潭之澤周四十里  
亦濰水枝津之所注也膠水又東北逕下密縣故  
城東又東北逕膠東縣故城西漢高帝元年別爲  
國景帝封子寄爲王國王莽更之郁秩也今長廣  
郡治伏琛晏謨言膠水東北廻達于膠東城北百  
里流注于海

又北過當利縣西北入于海

縣故王莽更之東萊亭也又北逕平度縣漢武帝  
元朔二年封菑川懿王子劉衍爲侯國王莽更名

水經卷之三十六  
之曰利盧也縣有土山膠水北歷土山注于海海  
南土山以北悉鹽坑相承修煮不輟北眺巨海杳  
冥無極天際兩分白黑方別所謂之溟海者也故  
地理志曰膠水北至平度入海者也

水經第二十六

水經第二十七

漢 桑 欽 撰  
後魏 酈 道 元 注  
明 吳 瑄 校

沔水上

沔水出武都沮縣東狼谷中

沔水一名沮水闕駟曰以其初出沮沔然故曰沮  
水也縣亦受名焉導源南流泉街水注之出河池  
縣東南流入沮縣會于沔

沔水又東南逕沮水戍而東南流注漢曰沮口

水經 卷之五  
所謂沔漢者也尚書曰嶓冢導漾東流爲漢山海經所謂漢出鮒嶠山也東北流得獻水口庾仲雍云是水南至關城合西漢水漢水又東北合沮口同爲漢水之源也故如淳曰北方人謂漢水爲沔水故孔安國曰漾水東流爲沔蓋與沔合也至漢中爲漢水是互相通稱矣

沔水又東逕白馬戍南瀼水入焉

水北發武都氏中南逕張魯城東魯沛國張陵孫曾學道於蜀鶴鳴山傳業衡衡傳於魯魯至行寬惠百姓親附供道之費米限五斛故世號五斛米

道初平中劉焉以魯爲督義司馬往漢中斷絕谷道用遠城治因卽嶓嶺周迴五里東臨瀼谷杳然百尋西北二面連峰接崖莫究其極從南爲盤道登陟二里有餘瀼水又南逕張魯治東水西山上  
有張天師堂于今民事之庾仲雍謂山爲白馬塞堂爲張魯治東對白馬城一名陽平關瀼水南流入沔謂之瀼口其城西帶瀼水南面沔川城側二水之交故亦曰瀼口城矣

沔水又東逕武侯壘南又東逕沔陽故城南

諸葛武侯所居也南枕沔水水南有亮壘背山向



水中有小城迴隔難解沔水又東逕沔陽故城南  
城舊漢祖在漢中言蕭何所築也漢建安二十四  
年劉備并劉璋北定漢中始立壇卽漢王位于此  
城其城南臨漢水北帶通達南面崩水三分之一  
觀其遺略厥狀時傳南對定軍山曹公南征漢中  
張魯降乃命夏侯淵等守之劉備自陽平關南渡  
沔水遂乃淵首保有漢中諸葛亮之灰也遺令葬  
于其山因卽地勢不起墳壘唯深松茂栢攢蔚川  
阜莫知墓營所在山東名高平是亮宿營處有亮  
廟亮薨百姓野祭步兵校尉習隆中書郎向充共

表云臣聞周人思邵伯之德甘棠爲之不伐越  
懷范蠡之功鑄金以存其像亮德軌遐邇勲蓋來  
世王室之不壞實賴斯人而使百姓巷祭戎夷野  
祀非所以存德念功追述在昔者也今若盡順民  
心則黷而無典建之宗師又逼宗廟此聖懷所以  
惟疑也臣謂宜近其墓立之沔陽斷其私祀以崇  
正禮始聽立祀斯廟蓋所啓置也鍾士季征蜀枉  
駕設祠營東卽八陣圖也遺基略在崩褫難識  
沔水又東逕西樂城北

在山上周三十里甚嶮固城側有谷謂之容裘谷

道通益州山多羣獠諸葛亮築以防違梁州刺史  
楊亮以卽嶮之固保而居之爲苻堅所敗後刺史  
姜守潘猛亦相仍此城城東容裘谿注之俗謂之  
洛水也水南遵巴嶺山東北流水左有故城憑山  
卽嶮四面岨絕言先主遣黃忠據之以拒曹公谿  
水又北逕西樂城東而北流注于漢

漢水又左得度口水

出陽平北山水有二源一日清檢出佳鱖二日濁  
檢出好鮒常以二月八月取之美珍常味度水南  
逕陽平縣故城東又南逕沔陽縣故城東而南流

注于漢水又東右會溫泉水口水發山北平地方  
數十步泉源沸湧冬夏湯湯望之則白氣浩然言  
能瘥百病云洗浴者皆有硫黃氣赴集者常有百  
數池水通注漢水

漢水又東黃沙水左注之

水北出遠山山谷邃嶮人跡罕交谿曰五丈谿水  
側有黃沙屯諸葛亮所開也其水南注漢水南有  
女郎山山上有女郎冢遠望山墳嵬嵬狀高及卽  
其所栽有墳形山上直路下出不生草木世人謂  
之女郎道下有女郎廟及擣衣石言張魯女也有

水經 卷之二十一  
小水北流入漢謂之女郎水

漢水又東合褒水

水西北出衙嶺山東南逕大石門歷故棧道下谷俗謂千梁無柱也諸葛亮與兄瑾書云前趙子龍退軍曉壞赤崖以北閣道緣谷一百餘里其閣梁一頭入山腹其一頭立柱於水中今水大而急不得安柱此其窮極不可強也又云頃大水暴出赤崖以南橋閣悉壞時趙子龍與鄧伯苗一戍赤崖屯田一戍赤崖口但得緣崖與伯苗相聞而已後諸葛亮歿于五丈原魏延先退而焚之謂是道也

自後案舊修路者悉無復水中柱逕涉者浮梁振動無不搖心眩目也褒水又東南逕三交城城在三水之會故也一水北出長安一水西北出仇池一水東北出太白山是城之所以取名矣褒水又東南得丙水口水上承丙穴穴出嘉魚常以三月出十月入地穴口廣五六尺去平地七八尺泉縣注魚自穴下透入水穴口向丙故曰丙穴下注褒水故左思稱嘉魚出於丙穴良木攢於褒谷矣褒水又東南歷小石門門穿山通道六丈有餘刻石言漢明帝永平中司隸校尉犍爲楊厥之所開逮

靈帝建和二年漢太中大夫同郡王升嘉厥開鑿之功琢石頌德以爲石牛道來攻本蜀論云秦惠王欲伐蜀而不知道作五石牛以金置尾下言能屎金蜀王負力令五丁引之成道秦使張儀司馬錯尋路滅蜀因曰石牛道厥蓋因而廣之矣蜀都賦曰岨以石門其斯之謂也門在漢中之西褒中之北褒水又東南歷褒口卽褒谷之南口也北口曰斜所謂北出褒褒水又南逕褒縣故城東褒中縣也本褒國矣漢昭帝元鳳六年置褒水又南流入于漢漢水又東逕萬石城下城在高原上原高

十餘丈四面臨平形若覆瓮水南過水爲岨西北並帶漢水其城宿是流襍聚居故世亦謂之流襍城

漢水又東逕漢廟堆下

昔漢女所遊側水爲釣臺後人立廟於臺上世人覩其頽基崇廣因謂之漢廟堆傳呼乖實又名之爲漢武堆非也

又東過南鄭縣南

縣故褒之附庸也周顯王之世蜀有褒漢之地至六國楚人兼之懷王衰弱秦略取焉周赧王二年

水經 卷之二十七  
秦惠王置漢中郡因水名也耆舊傳云南鄭之號  
始於鄭桓公桓公歿於犬戎其民南奔故以南爲  
稱卽漢中郡治也漢高祖入秦項羽封爲漢王蕭  
何曰天漢美名也遂都南鄭大城周四十二里城  
內有小城南憑北結環堆金墉漆井皆漢所修築  
地沃川嶮魏武方之雞肋曰釋騏驥而不乘焉皇  
皇而更求遂留杜子緒鎮南鄭而還晉咸康中梁  
州刺史司馬勳斷小城東面三分之一以爲梁州  
漢中郡南鄭縣治也自齊宋魏咸相仍焉水南卽  
漢陰城也相承言呂后所居也有廉水出巴嶺山

北流逕廉川故水得其名廉水又北注漢水漢水  
右合池水水出旱山山下有祠列石十二不辨其  
由蓋社主之流百姓四時祈禱焉俗謂之獠子水  
夾漈諸田散流左注漢水

漢水又東得長柳渡

長柳村名也漢太尉李固墓碑銘尚存文字剥落  
不可復識漢水又東逕胡城南義熙十五年城上  
有密雲細雨五色昭章人相與謂之慶雲休符當  
出曉乃雲霽及角城崩半許淪水出銅鍾十二枚  
刺史索邈奉送洛陽歸之宋府南對扁鵲城當是

越人舊所逕涉故邑流其名耳漢水出于二城之間右會磐余水水出南山巴嶺上泉流兩分飛清派注南入蜀水北注漢津謂之磐余口庾仲讎曰磐余去胡城二十里

漢水又左會文水

水卽門水也出胡城北山石穴中長老云杜陽有仙人宮石穴宮之前門故號其川爲門川水爲門水東南流逕胡城北三城奇對隔谷羅布溪溝固壘高臺相距門水右注漢水謂之高橋谿口

漢水又東黑水注之

水出北山南流入漢庾仲讎曰黑水去高橋三十里諸葛亮牋云朝發南鄭暮宿黑水四五十里指謂是水也道則百里也

又東過城固縣南又東過魏興安陽縣南泔水出自旱山北注之

常璩華陽國記曰蜀以城固爲樂城縣也安陽縣故隸漢中魏分漢中立魏興郡安陽隸焉泔水出西南而東北入漢左谷水出西面而東北入漢左谷水出漢北卽智水也北發聽山山下有穴水穴水東南流歷平川中謂之智鄉水曰智水川有唐

公祠唐君字公房城固人也學道得仙入雲臺山  
合丹服之白日升天雞鳴天上狗吠雲中唯以鼠  
惡留之鼠乃感激以月晦日吐腸胃更生故時人  
謂之唐鼠也公房升仙之日壻之行未還不獲同  
階雲路約以此川爲居言無繁霜蛟虎之患其俗  
以爲因號爲壻鄉故水亦卽名焉百姓爲之立廟  
於其處也刊石立碑表述靈異也壻水南歷壻鄉  
谿出山東南流逕通關勢南山高百餘丈上有匈  
奴城方五里濬塹三重高祖北定三秦蕭何守漢  
中欲修北道通關中故名爲通關勢壻水又東逕

七女冢冢夾水羅布如七星高十餘丈周廻數畝  
元嘉六年大水破墳墳崩出銅不可稱計得一博  
刻云項氏伯無子七女造槨世人疑是項伯冢水  
北有七女池池東有明月池伏如偃月皆相通注  
謂之張良渠蓋良所開也壻水逕樊噲臺南臺高  
五六丈上容百許人又東南逕大城固北城乘高  
勢北臨壻水水北有韓信臺高十餘丈上容百許  
人相傳高祖齋七日置壇設九賓禮以禮拜信也  
壻水東廻南轉又逕其城東而南入漢水謂之三  
水口也漢水又東會益口水出北山益谷東南流

注于漢水

漢水又東至瀟城南與洛谷水合

水北出洛谷谷北通長安其水南流右則瀟水注之水發西谿東南流合為一水亂流南出際其城西南注漢水

漢水又東逕小城固南

州治大城固移縣北故曰小城固城北百二十里有興勢坂諸葛亮出洛谷成興勢置烽火樓處通照漢水東歷上濤而逕於龍下蓋伏石驚湍流屯激怒故有上下二濤之名龍下地名也有丘擲墳

墟舊謂此館為龍下亭自白馬迄此則平川夾勢水豐壤沃利方三蜀矣度此溯洄從漢為山行之始

漢水又東逕石門灘

山峽也東會酉水水北出秦嶺酉谷南歷重山與寒泉合水東出寒泉湧山頂望之交橫似若瀑布頽波激石散若雨灑勢同厭源風雨之池其水西流入于酉水酉水又南注漢謂之酉口

漢水又東逕媯墟為灘

世本曰舜居媯汭在漢中西城縣或言媯墟在西



北舜所居也或作媯墟故舜所居也後或姓姚或  
姓媯媯姚之異事妄未知所從余按應劭之言是  
地於西城爲西北也

漢水又東逕猴經灘

山多猴猿好乘危綴飲故灘受斯名焉

漢水又東逕小大黃金南

山有黃金峭水北對黃金谷有黃金戍傍山依峭  
嶮折七里氏掠漢中岨此爲戍與鐵城相對一城  
在山上容百餘人一城在山下可置百許人言其  
嶮峻故以金鐵制名矣昔楊難當令魏興太守薛

健據黃金姜寶據鐵城宋遣秦州刺史蕭思話話  
令陰平太守蕭祖攻拔之賊退酉水矣

漢水又東合蘧蔭漢口

水北出就谷在長安西南其水南流逕巴谿戍西  
又南逕陽都坂東坂自上及下盤折一十九曲西  
連寒泉嶺漢中記曰自西城涉黃金峭寒泉嶺陽  
都坂峻嶮百重絕日萬尋旣造其峯謂已踰崧岱  
復瞻前嶺又倍過之言陟羊腸超煙雲之際顧看  
向塗杳然有不測之嶮山豐野牛野羊騰巖越嶺  
馳走若飛觸突樹木十圍皆倒山殫良岨地窮坎

勢矣其水南歷遠蔭谿謂之遠蔭水而南流注于漢謂之蔭口下流之蔭山漢水又東右會洋水言洋水川流漫濶廣幾里許洋水導源巴山東北流逕平陽城漢中記曰本西鄉縣治也自城固南城南入三百八十里距南鄭四百八十里洋川者漢戚夫人之所生處也高祖得而寵之夫人思慕本鄉追求洋川高帝爲驛致長安蠲復其鄉更名曰縣又故目其地爲洋川用表夫人誕載之休祥也城卽定遠矣漢順帝永光七年封班超以漢中郡南鄭

縣之西鄉爲定遠侯卽此也洋水又東北流入漢又謂之城陽水口也

漢水又東歷敖頭

舊立倉儲之所傍山通道水陸嶮湊魏興安康縣治有戍統領流襍

漢水又東合直水

水北出子午谷巖嶺下又南枝分東注旬水又南徙閣下山上有戍置於崇阜之上下臨深淵張子房燒絕棧閣示無還也又東南歷直谷逕直城西而南流注漢

漢水又東逕直城南

又東逕千渡而至蝦蟆嶺歷漢陽漁口而屆于彭谿龍竈矣並溪澗灘磧之名也

漢水又東逕晉昌郡之寧都縣南

縣治松谿口又東逕魏興郡廣城縣治王谷谷道南出巴獠有鹽井食之令人癯疾

漢水又東逕魚脯谿口

舊西城廣城二縣指此谷而分界也

又東過西城縣南

漢水又東逕鰲池而鯨灘鯨大也蜀都賦曰流漢

湯湯驚浪雷奔望之天迴卽之雲昏者也漢水又

東逕嵐谷北口嶂遠谿深澗峽嶮邃氣蕭蕭以瑟

瑟風颼颼而颼颼故川谷擅其目矣

漢水又東右得大勢

勢咀急谿故亦曰急勢也依山爲城城周二里在

峻山上梁州督護吉挹所治苻堅遣偏軍韋鍾伐

挹挹固守二年不能下無援遂陷

漢水右對月谷口

山有坂月川於中黃壤沃衍而桑麻列植佳饒水

田故孟達與諸葛亮書善其川土沃美也

水經 卷之二十七  
漢水又東逕西城縣故城南

地理志曰西城故漢中郡之屬縣也漢末爲西城郡建安二十四年劉備以申儀爲西城太守儀據郡降魏魏文帝改爲魏興郡治故西城縣之故城也氏略漢川梁州弘治於此城內有舜祠漢高帝廟置民九戶歲時奉祠焉

漢水又東爲鱸湍

洪波湊盪瀾浪雲頽古者舊言有鱸魚奮鰭溯流望濤直上至此則爆鯁失濟故因名湍矣

漢水又東合旬水

水北出旬山東南流逕平陽戍下與直水枝分東注逕平陽戍入旬水旬水又東南逕旬陽縣與柞水合水西出柞谿南流逕重巖堡西屈而東流逕其堡南東南注于旬水旬水又東南逕旬陽縣南縣北山有縣書崖高五十丈刻石作字今人不能上不知所道山下石壇上有馬跡五所名曰馬跡山旬水東南注漢之旬口

漢水又東逕木蘭塞南

石岸有城名陵城周廻數里左岸壘石數十行重壘數十里中謂是處爲木蘭塞云吳朝遣軍救孟

水經 卷之二十七  
達於此矣

漢水又東左得育漢

與晉旬陽二縣分界於是谷漢水又東谷甲水口水出秦嶺山東南流逕金井城南又東逕上庸郡北與關柎水合水出上洛陽亭縣北清泥西山南逕陽亭聚西俗謂之平陽水南合豐鄉川水水出弘農豐鄉東山西南流逕豐鄉故城南京相璠曰南鄉浙縣有故豐鄉春秋所謂豐浙也於地理屬弘農今屬南鄉又西南合關柎水關柎水又南入上津注甲水甲水又東南逕魏興郡之與陽南晉

武帝太康中立甲水又東右入漢水漢水又東爲龍淵淵上有胡鼻山石類胡人鼻故也下臨龍井渚淵深數丈

漢水又東逕魏興郡之錫縣故城北

爲白石灘縣故春秋之錫穴地也故屬漢水中王莽之錫治也縣有錫義山方圓百里形如城四面有門上有石壇長十餘丈世傳列仙所居今有道士被髮餌术恒數十人山高谷深多生薇蘅草其草有風不偃無風獨搖漢水又東逕長利谷南入谷有長利故城舊縣也

漢水又東歷姚方

蓋舜後枝居是處故地留姚稱也

水經第二十七

水經第二十八

漢桑欽撰

後魏酈道元注

明吳瑄校

沔水中

沔水又東過襄陽縣北

沔水又東逕方山北山上有鄒恢碑魯宗之所立

也山下潭中有杜元凱碑元凱好尚後名作兩碑

並述已功一碑沈之峴山水中一碑下之於此潭

曰百年之後何知不溪谷為陵也山下水曲之隈

水經 卷之二十八  
云漢女昔遊處也故張衡南都賦曰遊女弄珠於漢臯之曲漢臯卽方山之異名也

沔水又東合檀谿水

水出縣西柳子山下東爲鴨湖湖在馬鞍山東北武陵王愛其峯秀改曰望楚山谿水自湖兩分北渠卽谿水所導也北逕漢陰臺西臨流望遠按眺農圃情邈灌蔬意寄漢陰故因名臺矣又北逕檀谿謂之檀谿側有沙門釋道安寺卽谿之名以表寺目也谿之陽有徐元直崔州平故宅悉人居故習鑿齒與謝安書云每省家舅司檀谿念崔徐之

友未嘗不撫膺躊躇惆悵終日矣谿水傍城北注昔劉備爲景升所謀乘的顛馬西走墜於斯谿西去城里餘北流注于沔一水東南出應劭曰城在襄水之陽故曰襄陽也是水當卽襄水也城北枕沔水卽襄陽縣之故城也王莽之相陽矣楚之北津戍也今大城西壘是也其土古鄢都盧羅之地秦滅楚置南郡號北爲北部焉建安十三年魏武平荊州分南郡立爲襄陽郡荊州刺史治邑居隱賑冠蓋相望一都之會也城南門道東有三碑一碑是晉太傅羊祜碑一碑是鎮南將軍杜預碑一

碑是安南將軍劉儼碑並是學生所立城東門外  
二百步劉表墓太康中爲人所發見表夫妻其尸  
儼然顏色不異猶如平生墓中香氣遠聞三四里  
中經月不歇今墳冢及祠堂猶高顯整頓城北枕  
沔水水中常苦蛟害襄陽太守鄧遐負其氣果拔  
劍入水蛟繞其足遐揮劍斬蛟流血丹水自後患  
除無復蛟難矣昔張公遇害亦亾劍於是水後雷  
氏爲建安從事逕踐瀨谿所留之劍忽於其懷躍  
出落水初由是劍後變爲龍故吳均劍騎詩云劍  
是兩蛟龍張華之言不孤爲驗矣

沔水又逕平魯城南

城魯宗之所築也故城得厥名矣東對樊仲山甫  
所封也漢晉春秋稱桓帝幸樊城百姓莫不觀有  
一老父獨耕不輟議郎張溫使問焉父笑而不荅  
溫因與之言問其姓名不告而去城周四里南半  
淪水建安中關羽圍于禁於此城會沔水泛溢三  
丈有餘城陷禁降龐德奮劍乘舟投命於東岡魏  
武曰吾知于禁三十餘載至臨危授命更不如龐  
德矣城西南有曹仁記水碑杜元凱重刊其後書  
伐吳之事也



又從縣東屈西南清水從北來注之

襄陽城東有東白沙白沙北有三洲東北有宛口  
卽清水所入也

沔水中有魚梁洲

龐德公所居士元居漢之陰在南白沙故世謂是  
地爲白沙曲矣司馬德操宅洲之陽望衡對宇權  
情自接泛舟寒裳率爾休暢豈待還桂柁於千里  
貢溪心於永思哉水南有層臺號曰景升臺蓋劉  
表治襄陽之所築也言表盛遊於此常所止憇表  
性好鷹嘗登此臺歌野鷹來曲其聲韻似孟達上

堵吟矣

沔水又逕桃林亭東

又逕峴山東山上有栢宣所築城孫堅歿於此又  
有栢宣碑羊枯之鎮襄陽也與鄒潤甫嘗登之及  
枯薨後人立碑於故處望者悲感杜元凱謂之墮  
淚碑山上又有征南將軍胡罷碑又有征西將軍  
周訪碑山下水中杜元凱碑處  
沔水又東南逕蔡洲

漢長水校尉蔡瑁居之故名蔡洲洲大岸西有洄  
湖停水數十畝長數里廣減百步水色常渌楊儀

居上洄楊顥居下洄與蔡洲相對在峴山南廣昌里又與襄陽湖水合水上承鴨湖東南流逕峴山西又東南流注白馬陂水又東入侍中襄陽侯習郁魚池郁依范蠡養魚法作大陂陂長六十步廣四十步池中起釣臺池北亭郁墓所在也列植松篁於池側沔水上郁所居也又作石伏逗引大池水於宅北作小魚池池長七十步廣十二步西枕大道東北二邊限以高隄楸竹夾植蓮芡覆水是遊宴之名處也山季倫之鎮襄陽每臨此池未嘗不大醉而還恒言此是我高陽池故時人爲之歌

曰山公山何去往往至高陽池日暮倒載歸酪酏無所知其水下入沔沔水西又有孝子墓河南秦氏性至孝事親無倦親沒之後負土成墳常泣血墓側人有咏蓼莪者氏爲泣涕悲不自勝於墓所得病不能食虎常乳之百餘日卒今林木幽茂號曰孝子墓也其南有蔡瑁冢冢前刻石爲大鹿狀甚大頭高九尺制作甚工

沔水又東南邑城北

習郁襄陽侯之封邑也故曰邑城矣

沔水又東合洞口

水出安昌縣故城東北大父山西南流謂之白水  
又南逕安昌故城東屈逕其縣南縣故蔡陽之白  
水鄉也漢元帝以長沙卑濕分白水上唐二鄉爲  
春陵縣光武卽帝位改爲章陵縣置園廟焉魏黃  
初二年更從今名故義陽郡治也白水又西南流  
而左會昆水水導源城東南小山西流逕今山北  
又西南流逕縣南西流注于白水水北有白水陂  
其陽有漢光武故宅基址存焉所謂白水鄉也蘇  
伯河望氣處也光武之征秦豐幸舊邑置酒極懽  
張平子以爲真人南巡觀舊里焉東觀漢記曰明

帝幸南陽祀舊宅召校官子弟作雅樂奏鹿鳴上  
自御墳箎和之以娛賓客又於此宅矣白水又西  
合澧水水出于襄鄉縣東北陽中山西逕襄鄉縣  
之故城北按郡國志是南陽之屬縣也澧水又西  
逕蔡陽縣故城東西南流注于白水又西逕其城  
南建武十六年世祖封城陽王祉世子本爲侯國  
應劭曰蔡水出蔡陽東入淮今於此城南更無別  
水唯是水可以當之川流西注苦其不東且淮源  
咀礙山河無相入之理蓋應氏之誤耳洞水又西  
南流注于沔水

又東過中廬縣東淮水自房陵縣淮山東流注之  
縣卽春秋廬戎之國也縣故城南有水出西山山  
有石穴出馬謂之馬穴山漢時有數百匹馬出其  
中馬形小似巴滇馬三國時陸遜攻襄陽於此穴  
又得馬數十匹送建業蜀使至有家在滇池者識  
其馬毛色云其父所乘馬對之流涕其水東流一  
百四十里逕城南名曰浴馬港言初得此馬洗之  
於此因以名之亦云乘出沔次浴之又曰洗馬旣  
渡沔宿處名之曰騎亭然侯水諸蠻北逼是水南  
壅淮川以周田溉下流入沔

沔水又東南流逕黎丘故城西

其城下對繕州秦豐居之故更名秦洲王莽之敗  
也秦豐阻兵於黎丘黎丘城在觀城西二里建武  
三年光武遣征南岑彭擊豐二年朱祐自觀城淪  
豐於黎丘是也沔水又南與疎水合水出中廬縣  
西南東流至卽縣北界東入沔水謂疎口也水中  
有物如三四歲小兒鱗甲如鯪鯉射之不可入七  
八月中好在磧上自曝膝頭似虎掌瓜常沒水中  
出膝頭小兒不知欲取弄戲便殺人或曰人有生  
得者摘其臯厭可以小使名爲水唐者也

又南過郟縣東北一作印

沔水之左有騎城周廻二里餘高一丈六尺卽騎亭也縣故楚邑也秦以爲縣漢高帝十二年封黃極忠爲侯國縣南有黃家墓墓前有雙石闕彫制甚工俗謂之黃公名尚爲漢司徒沔水又東逕猪蘭橋橋本名荻蘭橋橋之左右豐蒿荻於橋東劉季和大養猪襄陽太守曰此中作猪屎臭可易名猪蘭橋百姓遂以爲名矣橋北有習郁宅宅側有魚池池不假功自然通洫長六七十步廣十丈常出名魚

沔水又南得木里水會

楚時於宜城東穿渠上口去城三里漢南郡太守伍寵又鑿之引蠻水灌田謂之木里溝逕宜城東而東北入于沔謂之木里水口也

又南過宜城縣東夷水出自房陵縣東流注之

夷水蠻水也相温父名夷改曰蠻水夷水導源中廬縣界康狼山山與荆山相隣其水東南流歷宜城西上謂之夷谿又東南逕羅川城故羅國也又謂之鄢水春秋所謂楚人伐羅渡鄢者也夷水又東南流與零水合零水卽汴水也上通梁州沒陽

縣之默城山司馬懿出沮之所由其水東逕新城  
縣之汴鄉縣縣分房陵丘謂之汴水又東歷幹鄉  
謂之幹水晉武帝平吳割臨沮之北鄉中廬之南  
鄉立上黃縣治幹鄉汴水又東歷宜城西山謂之  
汴谿東流合於夷水謂之汴口也與夷水亂流東  
出謂之淇水逕蠻城城南在宜城南三十里春秋  
若敖自羅敗退及鄢亂次以濟淇水是也夷水又  
東注于沔昔白起攻楚引西山谷水卽是水者也  
舊場去城一百許里水從城西灌城東入注爲淵  
今熨斗陂是也水潰城東北角百姓隨水流歿於

城東者數十萬城東皆臭因名其陂爲臭池後人  
因其渠流以結陂田城西陂謂之新陂覆地數十  
頃西北又爲土門陂從平路渠以北木蘭橋以南  
西極土門山東跨大道水流周通其水自新陂東  
入城城故鄢郢之舊都秦以爲縣漢惠帝三年改  
曰宜城其水歷大城中逕漢南陽太守秦頡墓北  
墓前有二碑頡郡人也以江夏都尉出爲南陽太  
守逕宜城中見一冢東向頡住車視之曰此居處  
可作冢後卒於南陽喪還至昔住車處車不肯進  
故吏爲市此宅葬之孤墳向塾冢前有二碑城南

有宋玉宅玉邑人雋才辯給善屬文而識音也其水又逕金城前縣南門有古碑猶存其水又東出城東注臭池臭池溉田陂水散流又入朱湖陂朱湖陂亦下灌諸田餘水又下入木里溝木里溝是漢南郡太守王寵所鑿故渠引鄢水也灌田七百頃白起渠溉三千頃膏良肥美更爲沃壤也縣有太山山下有廟漢末多士其中刺史三千石卿長數十人朱軒華蓋同會於廟下荊州刺史行部見之雅歎其盛號爲冠蓋里而刻石銘之此碑於永嘉中治爲人所毀其餘文尚有可傳者其辭曰峨

峨南岳烈烈離明寔敷儁又君子以生惟此君子作漢之英德爲龍光聲化鶴鳴此山以建安三年西崩聲聞五六十里雉皆屋雉縣人惡之以聞侍中龐季云山崩川竭國土將亾之占也十三年魏武平荊州沔南彫散

沔水又逕都縣故城南曰沔口西水又南逕沔水西古郟子之國也秦楚之間自商密遷此爲楚附庸楚滅之以爲邑縣南臨沔津津南有石山上有古烽火臺縣北有大城卽楚昭王爲吳所迫絕郢徙都之所謂鄢郡盧羅之地也秦以爲縣

沔水又東敖水注之

水出新市縣東北又西南太陽山西南流逕新市縣北又西南而右合枝水水出大洪山而西南流逕襄陽郡縣界西南逕狄城東南左注敖水敖水又西南流注于沔寔曰激口沔水又南逕石城西城因山爲固晉太傅羊祜鎮荊州立晉惠帝元康九年分江夏西部置竟陵郡治此

沔水又東南與白水合

水出竟陵縣東北耶屈山一名盧屈山西流注于沔魯定公四年吳師入郢昭王奔隨濟于成曰謂

是水者也又東過荊城東

沔水自荊城東南流逕當陽縣之章山東

山上有故城太尉陶侃伐杜曾所築也禹貢所謂內方山至于大別者也旣濱帶沔流寔會尚書之文矣

沔水又東右會權口

水出章山東南流逕權城北古之權國也春秋魯莊公十八年楚武王克權權叛圍而殺之遷權於那處是也東南有那口城權水又東入于沔沔水又東南與陽口合



水上承江陵縣赤湖江陵西北有紀南城楚文王自丹陽徙此平王城之班固言楚之郢都也城西南有赤坂岡岡下有瀆水東北流入城名曰子胥瀆蓋吳師入郢所開也謂之西京湖又東北出城西南注于龍陂陂古天井水也廣圓二百餘步在靈谿東江隄內水至淵深有龍見于其中故曰龍陂陂北有楚莊王釣臺高三丈四尺南北六丈東西九丈陂水又逕郢城南東北流謂之楊水又東北路曰湖水注之湖在大港北巷南曰中湖南隄下曰昏官湖三湖合爲一水東通荒谷荒谷東岸

有治父城春秋傳曰莫敖緼於荒谷群師囚於治父謂此處也春秋水盛則南通大江否則南迄江隄北逕方城西方城卽南蠻府也又北與三湖會故盛弘之曰南蠻府東有三湖源同一水蓋徙治西府也宋元嘉中通路自湖下注楊水以廣運漕楊水又東歷天井北井在方城北里餘廣員二里其深不測井有潛室見輒兵西岸有天井臺因基舊隄臨際水湄遊憇之佳處也楊水又東北流得東赤湖水口湖周五十里城下陂池皆來會同湖東北有大置臺高六丈餘縱廣八丈一名清暑臺

秀宇層明通望周博遊者登之以暢遠情楊水又東入華容縣有靈港水西通赤湖水口地多下湖周五十里城下陂池皆會來同又有子胥瀆蓋入郢所開也水東入離湖湖在縣東七十五里國語所謂楚靈王闕爲石郭陂漢以象帝舜者也湖側有章華臺臺高十丈基廣十五丈左丘明曰楚築臺於章華之上韋昭以爲章華亦地名也王與五舉登之舉曰臺高不過望國之氛祥大不過容宴之俎豆蓋譏其奢而諫其失也言此瀆靈王立臺之日漕運所由也其水北流注于楊水楊水又東

又北與祥谿水合水出江陵縣北蓋諸池散流咸所會合積以成川東流逕魯宗之壘南當驛路水上有大橋隆安三年桓玄襲殷仲堪於江陵仲堪北奔縊於此橋祚谿又東注船官湖湖水又東北入女觀湖湖水又東入于楊水楊水又北逕竟陵縣西又北納巾吐柘柘水卽下楊水也巾水出縣東一百九十里西逕巾城下城下置巾水戍晉元熙二年竟陵郡上巾水戍山得銅鐘七口言之上府巾水又西逕竟陵縣北西逕楊水謂之巾口水西有古竟陵大城古鄖國也鄖公辛所治所謂鄖鄉

水經 卷之二十八  
矣昔白起拔郢東至竟陵卽此也秦以爲縣王莽  
之守平矣世祖建武十三年更封劉隆爲侯國城  
傍有甘魚陂左傳昭公十三年公子黑肱爲令尹  
次于魚陂者也楊水又北注于沔謂之楊口中夏  
口也曹太祖之追劉備於當陽也張飛按矛於長  
坂備得與數騎卽趣漢津遂濟夏口是也沔水又  
東得澆口其水承大澆馬骨諸湖水周三四百里  
及其夏水來同浩若滄海洪潭巨浪縈連江沔故  
郭景純江賦云其傍側有珠澆丹灤是也  
又東南逕江夏雲杜縣東夏水從西來注之

卽睹口也爲中夏水縣故郢亭左傳所謂若敖聚  
於郢是也禹貢所謂雲土夢作乂故縣取名焉縣  
有雲夢城城在東北

沔水又東逕左桑

昔周昭王南征船人膠舟以進之昭王渡沔中流  
而沒歿於是水齊楚之會楚侯曰昭王南征之不  
復寡人是問屈完曰君其問諸水濱庾仲雍言村  
老云百姓佐昭王喪事於此成禮而行故曰佐喪  
左桑字失體耳

沔水又東合區亮水口

水北承亮湖南達于沔

沔水又東得合驛口

庾仲雍言須導村耆舊云朝廷驛使合王喪於是因以名焉今須導村正有大歛口言昭王於此殯歛矣

沔水又東謂之橫桑

言得昭王喪處也

沔水又東謂之鄭潭

言鄭武公與王同溺水於是今謂世數既縣為不近情矣斯乃楚之鄭鄉守邑大夫讚公言故世以

為鄭公潭耳

沔水又東得歛沔

言昭王濟自是歛沔故有歛沔之稱王尸豈逆流乎但千古茫昧難以昭知推其事類似是而非矣

沔水又東與力口合

又有隗水出竟陵郡新陽縣西南河地山東流逕新陽縣南縣治雲杜故城分雲杜立隗水又東南流注宵城縣南大湖又南入于沔水是曰力口

沔水又東南滙入水焉

沔水又東逕沌水口水南通縣之太白湖湖水東

水經 卷之五  
南通江又謂之沌口

沔水又東逕沌陽縣北

處沌水之陽也沔水又東逕林鄣故城北晉建興

二年太尉陶侃爲荊州鎮此也

又南至江夏沙羨縣北南入于江

庾仲雍曰夏口今曰沔口矣尚書禹貢云漢水南

至大別入江春秋左傳定公四年吳師伐郢楚子

常濟漢而陳自小別至于大別京相璠春秋土地

名曰大別漢東山名也在安豐縣南杜預釋地曰

二別近漢之名無緣乃在安豐也案地說言漢水

東行觸大別之陂南與江合則與尚書杜預相符

但今不知所是矣

沔水與江合流又東過彭蠡澤

尚書禹貢匯澤也鄭玄曰匯回也漢與江闔轉東

城其澤矣

又東北出居巢縣南

古巢國也湯伐桀桀奔南巢卽巢澤也尚書周有

巢伯來朝春秋文公十二年夏楚人圍巢巢群舒

國也舒叛故圍之永平元年漢明帝更封菑丘侯

劉般爲侯國也江水自濡須口又東左會柵口水

遵巢湖東逕烏上城北又東逕南譙僑郡城南又東絕塘逕附農山北又東左會清谿水水出東北馬子硯之清谿也東逕清谿城南屈而西南流歷山西南流注柵水謂之清谿口柵水又東左會白石山水水發白石山西逕李鵲城南西南注柵水柵水又東南積而爲竇湖中有洲湖東有韓縱山上城山北湖水東出爲後塘北湖湖南卽塘也塘上有潁川僑郡故城也湖竇湖水東出謂之湖竇口湖水東出逕刺史山北歷韓縱山南逕流二山之間出王武子北城城在刺史山上湖水又

東逕右塘穴北爲中塘塘在四水中水出格虎山北山上有虎山有郭僧坎城水北有趙祖悅城並故東關城也昔諸葛恪帥師作東興隄以遏巢湖傍山築城使將軍全端留略等各以千人守之魏遣司馬昭督鎮東諸葛誕率衆攻東關三城將毀隄遏諸軍作浮梁陳於隄上分兵攻城恪遣冠軍丁奉等登城鼓譟奮擊朱異等以水軍攻浮梁魏征東胡遵軍士爭渡梁壞投水而死者數千塘卽東興隄城亦關城也柵水又東南逕高江產城南胡景城北又東南逕張祖禧城南東南流屈而北

逕鄭衛尉城西魏事已難用取悉推舊訪新略究如此又北委折蒲浦出焉柵水又東南流注于天江謂之柵口水

又東過牛渚縣南又東至石城縣

經所謂石城縣者卽宣城縣郡之石城縣也牛渚在姑熟烏江兩縣界中也於石城東北減五百許里安得逕牛渚而方界石城也蓋經之謬悞也

分爲二其一東北流其一又過毗陵縣北爲北江

地理志曰毗陵縣舊會稽之屬縣丹徒縣也北二百步有故城本毗陵郡治也舊去江三里岸稍毀

遂至城下城北有揚州刺史劉繇墓淪于江江卽北江也經書在北江則可又言東至餘姚則非考其逕流知經之悞矣地理志曰江水自石城東出逕吳國南爲南江江水自石城東入爲貴口東逕石城縣北晉太康元年隸宣城郡東合天谿谿水首受江北逕其縣故城東又北入南江南江又東與貴長池水合

水出縣南郎山北流爲貴長池池水又北注于南江

南江又南東逕宣城之臨城縣南

又東合注涇水

南江又東與桐水合

又東逕安吳縣號曰安吳谿又東旋谿水注之水  
南出陵陽山下逕陵陽縣西爲旋谿水昔縣人陽子  
明釣得白龍處後三年龍迎子明上陵陽山山去  
地千餘丈後百餘年呼山下人上山半與語谿中  
于安問子明釣車所在後二十年子安歿山下有  
黃鶴栖其冢樹鳴常呼子安故縣取名焉晉咸康  
四年改曰廣陽縣漢水又北合東谿水水出南里  
山北逕其縣東桑欽曰淮水出縣之東南北入大

江其水又北歷蜀由山又北左合旋谿北逕安吳  
縣東晉太康元年分宛陵立縣南有落星山山有  
縣水五十餘丈下爲溪潭潭水東北流左入旋谿  
而同注南江之北卽宛陵縣界也

南江又東逕寧國縣南

晉太康元年分宛陵置南江又東逕故彰縣南安  
吉縣北光和之末天下大亂此保險守節漢朝嘉  
之中平二年分故彰之南鄉以爲安吉縣縣南有  
釣頭泉縣湧一仞乃流于川川水下合南江

南江又東北爲長瀆歷河口



江南東注于具區謂之五湖口五湖謂長塘湖太湖射貴湖滂湖也郭景純江賦曰注五湖以漫漭蓋言江水經緯五湖而苞注太湖也是以左丘明述國語曰越伐吳而戰於五湖是也又云范蠡滅吳返至五湖而辭越斯乃太湖之攝通稱也虞翻曰是湖有五道故曰五湖韋昭曰五湖今太湖也尚書謂之震澤爾雅以爲具區方圓五百里湖有苞山春秋謂之夫椒山有洞室入地潛行北通琅邪東武縣俗謂之洞庭旁有青山一名夏架山山有洞穴潛通庭山上有石鼓長丈餘鳴則有兵故

吳記曰太湖有苞山在國西百餘里居者數百家出弓弩材旁有小山山有石穴南通洞庭深遠莫知所極三苗之國左洞庭右彭蠡今宮亭湖也以太湖之洞庭對彭蠡則左右可知也余按二湖俱以洞庭爲目者亦分爲左右也但以趣矚爲方耳旣據三苗宜以湘江爲正是故郭景純之江賦云爰有包山洞庭巴陵地道潛達徬通幽岫窈窕山海經曰浮玉之山北望具區茗水出于其陰北流注于具區謝康樂云山海云浮玉之山在句餘東五里便是句餘縣之東山乃應入海具區今在餘

姚烏道山北何由北望具區也以爲郭於地理甚  
昧矣言洞庭南口有羅浮山高三千六百丈浮山  
東石樓下有兩石數扣之清越所謂神鉦者也事  
備羅浮山記會稽山宜直湖南又有山陰谿水入  
焉山陰縣西四十里有二谿東谿廣一丈九尺冬  
煖夏冷西谿廣三丈五尺冬冷夏煖二谿北出行  
三里至徐村合成一谿廣五丈餘而溫涼又雜蓋  
山海經所謂茗水也北逕羅浮山而下注于太湖  
故言出其陰入于具區也湖中有大雷小雷三山  
亦謂之三山湖又謂之洞庭湖楊脩五湖賦曰頭

首無錫足蹄松江負烏程於背上懷太吳以當曾  
昨嶺崔嵬穹窿紆曲大雷小雷湍波相逐用言湖  
之苞極也太湖之東吳國西十八里有昨嶺山俗  
說此本在太湖中禹治水移進近東又西南有兩  
小山皆有石如卷笮山云禹所用牽山也太湖中  
有淺地長老云是笮嶺山躡自此以求差深言是  
牽山之溝此山去太湖三十餘里

東則松江出焉

上承太湖更逕笠澤在吳南松江左右也國語曰  
越伐吳吳禦之笠澤越軍江南吳軍江北者也虞

氏曰松江北去吳國五十里江側有丞胥二  
各有廟國南五十里魯哀公十三年越使二大夫  
疇無餘謳陽等伐吳吳人敗之獲二大夫大夫歿  
故立廟於山上號曰丞胥二王也胥山上今有壇  
石長老云胥神所治也下有九折路南出太湖闔  
閭造以遊胥之臺以望太湖也松江自湖東北流  
逕七十里

江水奇分謂之三江口

吳越春秋稱范蠡去越乘舟出三江之口入五湖之  
中者也此亦別為三江五湖雖稱相亂不與職方

同庾仲初楊都注曰今太湖東注為松江下七十  
里有水口分流東北入海為婁江東南入海為東  
江與松江而三也吳記曰一江東南行七十里入  
小湖為次谿自湖東南出謂之為谷水吳記曰谷  
水出吳小湖逕由卷縣故城下神異傳曰卷縣秦  
時長水縣也始皇時縣有童謠曰城門當有血城  
陷沒為湖有老嫗聞之憂懼且往窺城門門侍欲  
縛之嫗言其故嫗去後門侍煞犬以血塗門嫗又  
往見血走去不敢顧忽有大水長欲沒縣主簿令  
幹入白令令見幹曰何忽作魚幹又曰明府亦作

魚遂乃淪陷爲谷矣因目長水城水曰谷水也吳  
記曰谷中有城故曰卷縣治也卽吳之柴辟亭故  
就李鄉構李之地秦始皇惡其勢王令囚徒十餘  
萬人汙其土表以汙惡名改曰囚卷亦曰由卷也  
吳黃龍四年有嘉禾生卷縣改曰禾興後太子諱  
和改爲嘉興春秋之構李城也谷水又東南逕嘉  
興縣城西谷水又東南逕鹽官縣故城南舊吳海  
昌都尉治晉太康中分嘉興治太康地道記吳有  
鹽官縣樂資九州志曰縣有秦逕山秦始皇逕此  
美人灰葬于山上山下有美人廟谷水之右有馬

畢城故司鹽都尉城吳王濞煮海爲鹽於此縣也  
是以漢書地理志曰縣有鹽官東出五十里有武  
原鄉故越地也秦於其地置海鹽縣地理志曰縣  
故武原鄉也後縣淪爲柘湖又徙治武原鄉改曰  
武原縣王莽名之辰武漢安帝武原之地又淪爲  
湖今之當湖也後乃移此縣南有秦望山秦始皇  
所登以望東海故山得其名焉谷水於縣出爲散  
浦以通巨海光熙元年有毛民三人集於縣蓋汎  
於風也

又東至會稽餘姚縣東入于海

謝靈運云具區在餘姚然則餘暨是餘姚之別名也今餘暨之南餘姚西北浙江與浦陽江同會歸海但水名已殊非班固所謂南江也郭景純曰三江者岷江松江浙江也然浙江出南蠻中不與岷江同作者述誌多言江水至山陰爲浙江今南江枝分歷烏程縣南通餘杭縣則與浙江合故闕駟十三州志曰江水至會稽與浙江合浙江自臨平湖南通浦陽江又於餘暨東合浦陽江自秦望分派東餘姚縣又爲江也東與車箱水合水出車箱山乘高瀑布四十餘丈雖有水旱而澍無增減

### 江水又東逕黃橋下

臨江有漢蜀郡太守黃昌宅橋本昌創建也昌爲州書佐妻遇賊相失後會於蜀復修舊好江水又東逕緒山南虞翻嘗登此山四望示子孫可居江北世有祿位居江南則不昌也然任江北者相繼代興時有江南者輒多淪替仲翔之言爲有驗有官倉倉卽日南太守虞國舊宅號曰西虞以其兄光居縣東故也是地卽其雙鴈送故處

### 江水又東逕餘姚縣故城南

縣城是吳將所築南臨江津北背巨海夫子所謂

水經卷之二十八  
三十一  
滄海浩浩萬里之淵也縣西去會稽一百四十里  
因其句餘山以名縣山在餘姚之南句章之北也  
江水又東逕穴湖塘湖水沃其一縣並爲良疇矣  
江水又東注于海

是所謂三江者也故子胥曰吳越之國三江環之  
民無所移矣但東南地卑萬流所湊濤湖泛決觸  
地成川枝津交渠世家分夥故川舊瀆難以取悉  
雖粗依縣地緝綜所纏亦未必一得其實也

水經第二十八

